

Txirritola

ARAMAIO / Barikua / 2003ko urtarrilaren 17a / 49. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Garzonen errekerimendua eta aurtengo aurrekontua

UBANE MADERA

Eguaztenean, urtarrilaren 22an, urteko lehenengo osoko bilkura egingo dute udaletxean. Eta, gainera, gogor hasiko dute urtea; izan ere, besteak beste, 2003rako aurrekontua eta Garzon epaileak Aramaio-ko Udalari egindako errekerimendua aztertuko dituzte zinegotziek osoko bilkuran.

Izan ere, dagoeneko hasi da Garzon epailea Euskal Autonomia Erkidegoko Udalei errekerimendua aurkezten. Aramaio-koak ere jaso du epailearen eskaera, eta oraingo asteen bertan bete dute. Izan ere, urtarrilaren 20a baino lehen bidali behar dute epaileak eskatutako dokumentazioa.

Errekerimendu horren arabera, 1979tik gaur egunera arte, Herri Batasuna, Euskal Herri-

rrok eta Batasuna talde politikoek herriko Udalean egindako interbentzio, protesta, mozio eta bestelako ekimenen aktak eman behar zaizkie epaileari. Aramaion 1983an sortu zen Herri Batasuna; hortaz, ordutik gaur egunera arteko informazioa (batu ahal izan dutena, behintzat) bidali dute Aramaiotik. Zazpi-zortzi zinegotziren gain izango du eragina.

Horren gainean berba egiteko ezker abertzaleko oraingo zinegotzi Amaia Asperekin izan gara. Baina zinegotziak adierazi digu ez duela horren berririk jaso Udaltetik, eta zur eta lur geratu da horren berri eman diogunean. Iñaki Nafarrate alkateak, berriz, adierazi digu errekerimendua derrigorrez bete beharrekoa dela, eta ez duela bestelako adierazpenik egingo, "oso gai serioa delako".

AURREKONTUA

Garzonen errekerimenduaz gain, 2003ko aurrekontuak ere aztergai izango ditu udalbatzarrak. Ogasun batzordeko buru Anjel Diaz de Ceriok esan digunez, oro har, iazkoa baino txikiagoa izango da udal aurrekontua, bereziki, Hirigintza Sailean. Horrez gain, Euskara eta Zerbitzu sailak ia berdin geratuko dira eta Kultura Sailean aurrekontua apur bat igoko da.



ARTXIBOA

Joan den barikuan jaso zuten Aramaio-ko Udalean Garzonen errekerimendua.

Gaur, barikua, jasoko du Bittor Mendialduak Landazuri saria

Gaur, barikua, banatuko dituzte 2001eko Landazuri sariak. 19:30ean hasiko da ekitaldia, Musikaren Etxea izeneko auditorioan, Gasteizen. Horrek esan gura du Bittor Mendialdua Aramaio-ko organo jotzailea ere han izango dela; izan ere, bakarka egindako lana kontuan hartuta, 2001eko sariduna hura izatea erabaki zuen Landazuri elkarteak. Taldekako sarien barruan, berriz, Arabako Elkarte Belenistikoa sarituko dute.

Jesus Maria Estarronak eta Maria Teresa Murgak aurkeztuko dute ekitaldia. Gero, kontzertua izango da, eta luncha ere emango dute hara doazenendako.

LANDAZURI SARIAK

Kulturaz eta arteaz arduratzen da Landazuri elkarteak. 1992an sortu zituen izen bereko sariak, eta harrezkero urtero-urtero eman ditu. Gure ohitura eta gure ondare musikala zabaltzeko egindako etengabeko eta irabazi asmo bako

lanagatik ematen ditu sari horiek Landazuri elkarteak.

Aurtengo sariduneri Armando Llanos izeneko eskultoreak diseinatutako lan bana emango diete sari gisa.

BITTOR MENDIALDUA

Azken 50 urteotan organo jotzaile lanetan ibili da Bittor Mendialdua Aramaion, kasu askotan ia, musu-truk. Eta horregatik ere omenaldia egin zioten herrian.



Aramaion ere harrera egin zioten

Domekan, harrera egin zioten Luis Mari Azkargorta *Kanto* preso politiko ohiari. Arexolan, *Kanto*-ren jaiotetxean, auto ilara egin zuten lehenengo, eta gero, Aramaio-ko Herriko Plazan batu ziren bai Azkargorta baita haren lagun eta senitartekoak ere. Horrela, eta herriko txistulariek lagunduta, besteak beste, aureskua eskaini zioten aramaioarrari. Gero, Arrasatera jaitsi ziren, eta preso zegoeneko argazkia erretiratu zuen Luis Mari Azkargortak berak. Horren ostean, Bergarara joan ziren; gaur egun, han bizi da, eta han ere harrera egin zioten.



Bakarka egindako lanagatik emango diote saria Bittor Mendialduari.

TELEFONO JAKINGARRIAK

OSASUNA / LARRIALDIK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martín Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zulako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

OHARRA: izartxoak duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu beharko dute honako zenbaki honetara: 629 54 59 23

OHARRAK

KONTZERTUA ANBOTON

Urban Fusion taldeak kontzertua emango du gaur, barikua, Anboton tabernan, 22:00etan. Mota askotako musika egiten du Urban Fusion taldeak, baina, batez ere, jazz erritmoak dira nagusi. Bost kidek osatzen dute taldea: hiru gasteiztarak dira, bat donostiarra eta bestea kubatarra.

ARETO FUTBOLA

Emaitza onak ekarri zituzten etxera joan den asteburuan Bañera elkarte-ko areto futboleko taldeek. Hala, kadete mailako mutilek, adibidez, 0-7 irabazi zioten El Pilar Marianistas taldeari; gazteek, berriz, 5-4 irabazi zieten Jesus Obrero taldekoiei. Neskek, bestalde, CD Aurrera taldearen kontra jokatu zuten, baina, jokatzen zebiltzala, itoginak sortu ziren Judimendin, eta partidua bertan behera utzi behar izan zuten, hurrengo baterako.

ZINEMA

Oraingo domekan, *El rey de la granja* izeneko filma emango dute, kultura etxean, 17:00etan.

KIROLA

Aramaioko pilotari gaztetxoak Gasteizen izan ziren

Joan den domekan, urtarrilaren 12an, Aramaioko Barea Pilota Elkarteko pilotari gazteak Gasteizen izan ziren. Zaramaga auzoko txapelketan hartu zuten parte aramaiotarrek. Hain zuzen ere, Aramaioko hiru bikotek jokatu zuten Zaramagako txapelketan, eta bikoteetako bik debuta egin zuten, praka zuriak jantzita, dotore-dotore. Hala, eta nahiz eta partidua ondo jokatu, urduri samar zeuden pilotari gazteak, eta galdu egin zituzten estraine-ko bi partidua: Ander Aspek eta Ander Lópezek osatutako bikoteak 16-12 galdu zuen eta Ekainek eta Mikelek osatutakoak, berriz, 16-11.

Bestalde, hirugarren bikotea, Xabik eta Igorrek osatutakoa, finago ibili zen eta 18-17 irabazi zuen. Hori bai, partidua osoan atzetik ibili ziren Aramaioko pilotariak, eta, azkenean, tanto bakarraren aldearekin irabazi zuten; horrenbestez, pilotan duten esperientzia argi erakutsi zuten partiduan.



Mikel, Igor, Xabi, Ander Aspe, Ekain eta Ander López pilotariak.

BAREA PILOTA ELKARTEA


BOTEPRONTOAN/ Beni Peciña · Iturrieta sagardotegikoa

“Aurtengo sagardoak graduazio txikiagoa izango du, samurragoa izango da, horiagoa eta zapore goxokoa”

Eguztenean, hilaren 15ean, txotx egin zuten Aramaioko Iturrieta sagardotegian. Betiko moduan, giro ezin hobean estreinatuta dute aurtengo sagardoa, herriko trikitilariak, txalapartariak, bertsolariak eta, jakina, aramaiotar ugari lagunduta. Horrez gain, Bat Bi eta Hiru eta Rufian taldeak ere han izan ziren, giroa berotzen. Gu Peciñatar anaietako batekin izan gara aurtengo sagardoaren gainean berbetan; honako hauxe kontatu digu Benik:

Zelakoa da aurtengo sagardoa?

Nik hasieran usten nuen pattal samarra izango zela, aurtun, hemengo sagarrek azukre kantitate txikia izan dute-eta. Hori bai, sagar ugari izan ditugu, eta haien gainerako ezaugarriak (taninoak, azido malikoa...) egokiak izan dira. Hortaz, aurtengo sagardoak graduazio txikiagoa izango du (apurtxo bat), samurragoa izango da, baita horiagoa ere (ia berdea), eta oso zapore goxoa izango du. Lasai eta gustura edateko sagardoa izango da. **Zenbat litro egin dituzue?** Gutxi egiten ditugu; autokontsumorako egiten dugu, sagardotegirako. Eta sagardo apurtxo bat botiletan sartzen dugu, baina hemen saltzeko. Batez beste,



“Inguruko baserritarrek egiten dugu lan, Aramaiotik hasi eta Bergararainokoekin”

10.000 litro egin ditugu. **Hemengo sagarrak erabili dituzela esan didazu; Aramaiokoak bakarrik?**

Aramaiokoak ere badira. Guk, adibidez, 1.000 sagar baino gehiago ditugu landatuta, baina gazteak dira eta oso sagar gutxi ematen dute. Hortaz, inguruko baserritarrek ere egiten dugu lan, Aramaiotik hasi eta Bergararainoko zenbait baserritarrek, hain zuzen ere.

Zenbat sagar behar dituzue, bada?

Asko. Kontuan hartu behar da guk oso sistema errudimentarioa dugula (prentsa, adibidez, eskuz erabiltzekoa da); horren ondorioz, erabiltzen ditugun 100 sagarretatik 60-65 aprobetxatzen ditugu. Hortaz, 18.000 kilo inguru behar izaten ditugu.

Lau urte daramatzazue sagardogintzan; egin duzue aldake-

taren bat urteotan?

Bai. Lehenengo urtean, sagardo gutxi egin genuen, eta edaria, batez ere, kanpotik (Gipuzkoatik) ekarri genuen. Handik aurrera, geroago eta kantitate handiagoa egiten hasi ginen, eta edariaren erdia ekartzen genuen kanpotik. Zergatik? Hasten ari ginelako eta ezin genuelako arriskatu, produkzio eskas batek denboraldi osoa galaraz diezaguke-eta. Hala, horren ondoren, guk egin dugu sagardoa, ibarrekiko sagarrek. Hori bai, prentsa berria erosi dugu. Edozellan ere, lehen esan bezala, guk egokitu dugu. Eta, esate baterako, sagarrak guk garbitu eta aukeratzen ditugu, banan-banan.

Edozellan ere, aurrera begira sagardo kantitate handiagoa egin gura dugu, betiere, produkzio baxuaren barruan, baina orain baino gehiago. Hori bai, hemengo sagarrek lanean jarraitu gura dugu; hortaz, horrek ere ezartzen digu muga. **Zuk zeuk zer edo zer gehitzeko baduzu?**

Espero dut aurtengo denboraldia ona izatea eta gure sagardoa jendeak gustuko izatea. Eta azpimarratu gurako nuke giro ederra sortzen dela paraje ezin hobe honen baitan.

GIZARTEA

Espainiako gerran askatasun barik egoteagatik kalte-ordainak eskatzeko epea

Otsailaren 28ra arte luzatu dute 36ko gerraren ondorioz kartzelatan edo kontzentrazio-esparruetan preso egon zirenek kalte-ordainak eskatzeko epea. Kalte-ordainak preso egon zirenek eska ditzakete; eta pertsona hori hilda bada, haren alargunak edo bikotekideak. Horrekin batera, erretiro-pentsioa edo gerrako beste pensioen bat jasotzen dutenek ere eskatu ahal izango dituzte; ez, ordea, 1991n arrazoi beragatik dirulaguntzak jaso zituztenek. Eta 1991n dirulaguntza eskatu arren ukatu egin zirenen orain eskatu ahal dituzte kalte-ordainak.

Azaroaren 11n abiatu zuen ekimen hori Eusko Jaurlaritzak, eta zenbait baldintza zehaztu zituen dirulaguntzak eskatzeko, hala nola: interesatuek azaroaren 29an 65 urte edo gehiago izan behar zituzten eta askatasun barik sei hilabete baino gehiago pasatu behar izan zituzten, besteak beste.